

# ALL NATIONS GOSPEL PUBLISHERS



[www.angp-hb.co.za](http://www.angp-hb.co.za)



[info@angp.co.za](mailto:info@angp.co.za)

*TSHILUBA Heart Book*

# MUTSHIMA WA MUNTU



**COPYRIGHT**

**ISBN 0 - 908367 - 01 - 5**

**E-MAIL: [info@angp.co.za](mailto:info@angp.co.za)**

**ALL NATIONS GOSPEL PUBLISHERS**

**P.O. BOX 2191, PRETORIA, 0001, R.S.A.**

(Une Mission de Littérature évangélique financée de dons)

(Reg. No. 1961/001798/08)

## MUTSHIMA WA MUNTU

**Ntempelo wa Nzambi anyi Tshitanda tshia Satana.**

**(1 Yone 3:4-10.)**

Mukanda eu kawena muhia-muhia nansha. Wakamueneka mu France bidimu 200 ku nyima ne wakasanakisha binunu ne binunu bia bantu. Udi lumuenu ludi bantu mua kutangila n'alu mushindu wa mitshima yabo bu mudi Nzambi mene ubamona. Ba bungu, mu dibala dia mukanda eu bakujinggulula ne mitshima yabo idi mibi. Ku ditonda diabo, bakuheta muoyo muhia-muhia ne mitshima mihia-mihia.

Mu dibala dia mukanda eu, uvuluke ne udi lumuenu ludi mua kuditangila n'alu wewe nkayebe. Biwikala muhaki wa manga anyi muena diabololo anyi muena kuitabusha mumane kuhidia ditabusha diebe, neusangane tsindidimbi tsiebe bu mudi Nzambi ukumona. Nzambi katu wamona mpala wa muntu. Utu watangila anu mutshima wa muntu.

Satana udi tatu wa mashimi, mukelenge wa midima ne nzambi wa ha buloba ebu. Udi umueneka bu muanjelo wa munya, kadi kena muanjelo wa munya bu mudi ba bungu bitabusha. Bu muakadibi kale, muomumue ne matuku etu â. Kudi bapostolo ba mashimi, bena mudimu ba mashimi badi bamueneka bu bapostolo ba Kilisto. Malu â kaena mua kutukemesha nansha, bualu bua Satana mene udi umueneka misangu mikuabo bu muanjelo wa munya. (II Kolinto 11:13-14.) Satana, udi ubuikila mesu ne lungenyi bia bantu bua kabamonyi munya wa Lumu Luimpe ne butumbi bua Kilisto. (II Kolinto 4:4.) Bantu babi ne bena buhidia badi bafue ne badi bafobo ku mesu kua Nzambi. Bu mudi luendu lua ha buloba, mudi mukelenge wa bukole bua mu mpehele, ne nyuma idi yenzesha mu mitshima ya bantu bahale. (Ef. 2:2) Anu bikala mesu abo matabale mpindiu, kadi tshianana badi baya bonso mu nshila wa dibutuka tshiendelele.

Bua bualu ebu Muana wa Nzambi wakamueneshibua bua kubutuleye midimu ya diabololo. (1 Yon. 3:8) Nudi-kokeshe kudi Nzambi; kadi nukandamene diabololo ne yeye neanunyeme. Semenai ha buihi ne Nzambi ne Yeye neasemene ha buihi n'enu. (Yakobo 4:7-8)

Mu dibala dia mukanda eu ne mu dilonga dia bindidimbi bidimu, udi mua kumona mushindu udi mutshima webe. Kuhudi bua Munya wa Nzambi kukuleshau mushindu wa mutshima webe mene mene nansha.

Itabusha mibi yebe, kuvidi ne kayenaku. Bualu bua Df dia Nzambi didi diamba ne, "Hatuamba ne, Katuena ne mibi tudi tudidinga ne bushuwa kabuena munda muetu. Bituatonda mibi yetu, yeye udi wa kueyemenyibua ne udi ne buakane bua kubuikila mibi yetu ne bua kutulengesha ku malu mabi onso." (1 Yone 1:8-10) "Mashi a Yesu Kilisto muana wa Nzambi adi atulengesha ku bubu buonso. (1 Yone 1:7)

Udi mukokeshibue kudi Nzambi anyi kudi Satana? Udi muhika wa Satana anyi muena mudimu wa Nzambi? Bikala mutshima webe mukokeshibue kudi bubu, kuvidi nansha; ubikile Nzambi, Yeye udi hehi n'ebe bua kukusungila. Yesu Kilisto wakalua ha buloba bua kusungila bantu babi. Wakatekesha bukole budi Satana ututekesha n'abu ku malu mabi. Yeye udi luhandu luetu. Wewe udi ku mpala kua Nzambi wa Tshijila utu wamona malu masokoka. Yeye utu wamona meji ne bienzedi bisokoka bia mu mutshima webe. Mbualu bukole bua kusokoma ku mpala kua Nzambi anyi kusokoka bienzedi biebe. Munyi mudi wakafuka ditshu diebe kai mua kunvua? Munyi mudi wakafuka disu diebe kai mua kumona?

"Bualu bua mesu a Nzambi adi akenzakana ku nseke yonso ya buloba bua kulesha bukole buandi kudi bantu badi ne mitshima miakane kudiye." (II Kul. 16 : 9)

"Bualu bua mesu andi adi matangile ku bienzedi bia bonso, utu watangila nshila wa muntu ne muntu. Kakuena midima idi mua kusokoka benji ba malu mabi." (Yobo 34 : 21-22).

"Kadi Yesu kakaditeka mu bianza biabo bualu bua wakadi mubamanye bonso." (Yone 11 : 24).

Nunku, "Muntu udi ne buhidia buandi bumushibue ne bubi buandi bubuikidibue udi ne disanka. Muntu udi Nzambi kai ubala mibi yandi ne udi kai ne lubombo mu mutshima wandi udi ne disanka." (Mis. 32:1-2.) Bala kabidi Misambu 51. Yesu udi ukubikila lelu kabidi: "Luai kundi, bonso badi ne mudimu mukole, badi ne bujitu bunene, meme nenuhe dikisha." (Mat. 11:28-30.)

### **DIJINGULULA DIA BINDIDIMBI TSHINDIDIMBI TSHIA KUMUDILU.**

Tsindidimbi etshi tshidi tshilesha mutshima wa muntu mubi, wa muntu mukokeshibue kudi malu a ha buloba ne udi kai muledibue tshiakabidi. Mu mukanda wa Nzambi badi bamubikila ne, "muntu mubi;" Udi ne meji mabi a ha buloba ebue ne udi musue masanka a mubidi. Etshi ntsindidimbi mene tshia mutshima wandi bu mudi Nzambi ūmona. Mesu makunze adi alesha dinua diandi dia maluvu, bu mutudi tubala mu Nsumuinu 23:29-33: "Badi batua mikemu mbanganyi? Badi ne tunyinganyinga mbanganyi? Badi ne kutandangana mbanganyi? Badi ne kutontolola mbanganyi? Badi batahika mputa ya hatuhu ham'bidi mbanganyi? Badi ne mesu makunze kunzū mbanganyi? Anu badi bashikama ku maluvu musangu mule, badi baya kula-bula maluvu masambakasha.

Kutangidi maluvu hatshidiu makunze kunzū, hatshidiu akenka mu dikoho ne hadiu ahita bimpe ha muminu. Ku nyima adi asuma bu nyoka wa ntoka. Mesu ebe neatangile ku bakashi ba bende, ne mutshima webe newambe mei a buhote a bungu. (Nsu. 23:31-33)

Muinshi mua mutu udi mu tshindidimbi etshi, udi umona mutshima wa muntu. Nyama ya bungu idimu idi ilesha mibi ya bungu idi mu mutshima bualu bua ngou udi muaba udi mibi yetu isomba. Mu mukanda wa Yemeya Nzambi udi utuambila ne "Mutshima udi uhita bintu bionso kudinga muntu ne udi mubi; nganyi udi mua kumanya bualu ebue? (Yemeya 17:9) Yesu nkayandi udi ushindika bualu ebue hadiye wamba ne, "Mu mitshima ya bantu mudi muluhuka meji mabi ne tshierendenda tshia masandi ne kushiha bantu, ne



**MUTSHIMA WA MUNTU MUBI.**

buivi, lukuka lua biuma ne malu mabi ne mashimi ne bulobo ne disu dia lukuka ne bijanu ne kudisua ne buhale. Malu â onso adi aluhuka munda mua muntu, ngadi amubihisha. (Mk. 7 : 21-23).

**Nyunyu wa Kaiba:** (mu francais Paon) Bakuabo ba munkatshi muetu bakumana kumona nyunyu eu muimpe ne mulengele; masala andi adi ne bulengele ne mubidi wandi onso udi usankisha mesu a badi bamumona. Nyunyu eu udi utamba kuikala ku mputu ne kena mu Afrique to. Bu mudi bantu bonso bakema bua buimpe bua nyunyu eu, mu muoyo wa muntu udi tshilejelu tshia kudisua. Diabolo, muanjelo mulami wakadi wenda ne mikenji ya Nzambi kale, muanjelo muimpe wa Nzambi, wakahona bua kudisua ne wakalua muena lukuna wa Nzambi. (Yesheya 14:9-17; Yehezekele 28:12-17) Mpindiu diabolo udi muanjelo wa mfdima.

Kudisua kudi kumueneka mu mishindu mitahuluke ya bingi; bantu bakuabo badi badisuila mu bubanji buabo, mu dimanya diabo dimpe, mu divuala diabo dia bintu bihia-bihia ne baleshilaku mibidi yabo kabayi ne bundu. Banga badi bavuala nkanu ya mushinga mukole, ya ku maboko ne tukanu tua ku minu bu mudi muambi Yesheya wamba mu 3:17-23. Badi bahua muoyo ne Nzambi kena unvuila bena kudisua, kadi udi unvuila badi ne mitshima mihuekele. (1 Pet. 5:5) Nzambi udi munyoke kudisua ne kahetu. (Nsu. 8:13) Kudisua kudi kuya ku mpala kua kubutuka, mutshima wa dihetu udi uya ku mpala kua kudishinda. (Nsu. 16 : 18).

**Mbua:** Mbua udi tshilejelu tshia lukuka, tshia dikuma dia mutshima ku malu a hanshi. Kuonso kudi mbua uya, udi udibonda. Bantu ba bungi badi muomu-mue. Kuonso kudibo baya badi badibonda mu tshie-ndenda tshia masandi. Malu â mabi adi mahite bungi mu matuku â mpindiu. Bahiankunde ne bantu babake ne badi mu lufuila badi babuelakana mu masandi. Kabena bamanye mua kudikanda. Nunku, tudi tuvuluka mei a Yesu kale bu bidimu 2,000 ne, "Matuku a

**kunshikidilu neikale bu matuku a Sodome ne Amole.**

Lukuka elu kaluena anu kudi balume ne bakashi ba tshianana, kadi lukadi lubuela tō ne mu nsubu ya bena Nzambi, mu bilongedi bia tulasa, mu mpangu ya bana balume ne bana bakashi. Bulelela, lutete elu lua bubi ludi lumane kukunyibua mushindu mubi mu mitshima ya bantu, ku bindidimbi bibi bidi binyunga (cinéma), manayi mabi, mikanda ya malu a tshianana ne mu mishindu mikuabo ya bungi. Nunku malu a bungi adi abikidibua ne, "A bena lelu." Nzambi udi yeye wâbikila ne mbubi. Mbombo ne mbombo ya bansongalume ne bansongakashi idi yûsha mitshima yabo ne malu mabi adibo babala mu mikanda ya tshianana, adibo bamona mu bindidimbi, ne malu â adi abafikisha ku makenga ne bundu. Banga batu balua kuâlekela ku nyima. Balume ne bakashi balongolodi ba manaya a mushindu eu, badi bena bienzenza, mpindiu bakulua batshimunyi ba buloba. Nsubu ya maja idi miaba ya bukoya. Kadi bena mitshima mitoke, kabena bangatshibua bu tshilejelu nansha. (Yosefe, bala Genese 39) Nzambi kena utuambila bua tuetu kusaba se masandi nansha. Tudi ne bua kuânyema. Buak. 22:15. "Nyemai masandi. Bubi buonso budi muntu wenza kabuena bua mu mubidi wandi, kadi udi wenda masandi udi wenzela mubudi wandi bibi. Kuena mumanye ne mubidi webe udi ntempelo wa Nyuma Muimpe udi munda muebe uwakuheta kudi Nzambi anyi? Kanuena balami ba mioyo yenu. (I Kol. 6:18-19 Biashiha muntu ntempelo wa Nzambi, Nzambi neamushihe yeye, bualu bua ntempelo wa Nzambi udi wa tshijila, nuenu nudi muomumue kabadi. (I Kol. : 3 : 17).

3. **Ngulube.** Udi ulesha dinua dia maluvu ne bu-diavi. Ngulube udi nyama wa bukoya, udi udia bionso bidibe usangana mu wandi nshila ne mbimpe ne mbibi. Bantu bakuabo kabidi badi nunku. Badi banyanga mibidi yabo, Ntempelo wa Nzambi muine, ne dinua dia makanya nansha dia diamba. (I Kol. 3:16-17.) Bintu ebi bidi binyanga meji a muntu, bimulembakasha ne bimushiya muntu wa tshianana ne muhika wabi tshiendelele. Bidi bitekesha mubidi wa muntu kabidi. Bukole



bua Nzambi nkayabo mbudi mua kuehula bantu ba mushindu eu batshidi basuikibue kudi diabolo mu nkana ya mushindu eu.

Mudiavi kabidi udi muntu mubi ku mesu kua Nzambi. Tudi tudia bua kuikala ne muoyo; kadi katuena ne muoyo bua didia nansha. Muntu udi ne nzala udi mua kûkûta biadieye bidia bia mankeda, kadi mudiavi udi wela di diandi misangu yonso ne "Umpe, umpe," anyi "Bikuabo, bikuabo."

Lukuka alu kalutu lushika anyi lukuta. Mu Dihungila Dikulukulu mudiavi ne munuavi bakadi ne bua kukumbua mabue. (Dut. 21:18-21). Bualu bua muena maluvu ne muena lumpukusu nebahete buhele; ne tulu tua bungi netuluatshishe muntu ne bilulu bisunsuke. (Nsu. 23:21) Udi ukuata bulunda ne bena lumpukusu udi ufuisha tatu wandi bundu. (Nsu. 28:7) Uvuluke mubanja mukuabo wakadi mudiavi, muhika wa lukuka lua mubidi, hakafueye wakabisha mesu andi mu ngena ne dikenga denene. Katuena mua kubala malu mabi adi afuma ku bunuavi nansha. Tudi mua kubilengulula. Nzambi udi utuambila mu mukanda wandi ne, Munuavi nansha umue kena ubuela mu bukelenge bua mu diulu. Maluvu a batoke nansha a bafike kaena bia kudia bidi bisangasha mubidi nansha. Adi tshintu tshidi tshibondakasha ne tshisamisha meji a muntu bua enze malu mahote a bungi. Badi babuela mu matandu, bienzenza matuku onso makuabo nansha. "Maluvu adi bu muena diyoyo. Udi ulonda dihambuisha diau kena ne meji." (Nsu. 20:1) Benji ba maluvu ne bahanyi bau badi kabidi bena tshilumbu bualu bua Nzambi udi wamba ne: "Mulau kudi badi ne dikima dia kunua nvinyo ya bungi ne badi basangisha maluvu a bungi." (Yesheya 5:22) "Udi uha mukuabo mâla a kunua, udi umukuatshisha maluvu, udi ukumbasha lulengu kûdi bua wewe umone butaka buado, udi ne mulua." (Hab.2:15) "Badi ne bisanji ne nshiba ne nzenze ne makasa ne mâla ku bidia biabo bia disanka, kabena belangana meji a mudimu wa Yehowa, kabena bajingulula bienzedi bia bianza." (Yesheya 5:12) Kanudingibu,

beni mpingu, beni masandi, beni mashimi, bivi, beni lukuka lua bintu, banu ba maluvu, bahendianganyi ne banyengi kabena bahiana bukelenge bua Nzambi. (1 Kol. 6:10) Bubi bua ha buloba ebu budi buambibue mu Gal. 5:19-20. "Malu mabi adi mubidi wenza adi amueneka ne, Tshindenda tshia maluda mabi, meji mabi, masandi, ditendelela dia mpingu, kuhaka kua manga, lukuka, kutandangana, mukau, tshiji, budiavi ne malu a mushindu eu. Bantu badi benza malu â kabena bahiana bukelenge bua Nzambi.

"Kanukuatshiki maluvu a nvinyo, adi bubi. Ikalai bûshibue tente ne Nyuma." (Efeso 5:1.)

Mona dibikila dia Yesu kudi bonso badi ne nyota: "Bikala muntu ne nyota alue biandi kundi ne ariue biandi." "Nuenu bonso badi ne nyota, luai ku mai, nansha udi kai ne mpalata! Luai, sumbai maluvu ne mabele, kanuyi ne mpalata, kanuyi nufuta" (Yesh. 55 : 1). "Wanua mai namuha kena wikala ne nyota kabidi tshiendelee; mai anamuha neikale munda muandi bu mpokolo wa mai abanda mu muoyo wa tshiendelee." (Yon. 4:14).

4. NKUVU anyi NKUDI udi tshilejelu tshia bu-fuba (diteka anyi dilayidila dia malu onso makelela) ne buloji (anyi majimbu). Dihanga kuitabusha didi kabidi bu muhongo. "Dinanga dia muhele didi dimu-shiha bualu bua bianza biandi bidi bibenga mudimu. Matuku onso udi unvua dinanga edi." (Nsu. 21:25-26) Yoshua wakambila bana ba Isalele ne: "Kanuiyadi bafuba hanuabuela mu buloba . . ." Mubidi wa muntu mutekete, kawena mua kuheta malu onso a Nzambi. Yesu wakamba ne; "Nudikoleshe bua kubuela mu mu-shiku wa mbelu udi mubumbakane (Lk. 13:24.) "Wa-keba neahete." "Bukelenge bua mu diulu budi bubue-dibue ku bukole, banyengi badi babunyenga ku bukole." (Mat. 11:12).

Mufuba udi udishinda ku mateyi a bungi. Bualu bua udi ubanga kuiba kena musue kuenza mudimu. Kuiba kuandi kudi mua kumufikisha ku bilumbu bia bungi bikuabo nansha kushiha kua muntu mene.

Bufuba, mu malu a muoyo wa tshiendelele anyl a bulengele bua mutshima budi bufila muntu anu ku nshila wa kabutu. Budi butuhumbisha bua tuetu kuentendelela, kukeba malu masokoka a Nzambi, kuangata milayi yakatulaya Nzambi, budi butufila anu ku dibutuka. Hadi Nzambi wakula n'ebe, ukuambila bua wewe kumuha mutshima webe lelu diabololo udi ukuambila ne: "Anu makelela anyi dituku dikuabo dimpe," haudi kuyi mua kufikilaku misangu mikuabo. Nunku kuena musungidibue guena ne Yesu; Nzambi udi wamba ne: "Lelu hanunvua di diandi kanukoleshi mutshima yenu." (Ebelu 3:7-8) Ba bungi bakumana kafua anu bualu bua bakalayidila muoyo wa tshiendelele. Kuedianganyi meji a makelela.

Banga bantu badi benza mudimu ne tshihusu tshia nkuvu bua kuenza majimbu abo. Mu tshindidimbi etshi Nkuvu udi ulesha muhongo; wa kutekesha majimbu, kuenza majimbu anyi kubuka ha mutu ha kutekemena Nzambi wa muoyo. Nangananga tshikondo tshia disama, mateta, diakabi, anyi buhele, di didi dituambila ne tubikile Nzambi wa muoyo. Yeye mene udi hehi ne kutukuathisha, ne bua katuena mua kutekemena dialengele anyi diakabi.

"Bualu bua makasa a muntu muakane adi malombodibue kudi Nzambi." (Mis. 37:23) Yehowa udi ujadika makasa a muntu, ne udi usanka bua nshila wandi, biadishindeye, kena ukuatshika buowa . . ." Kubanda kakuena kufuma kudi diba dihatukila anyi kudidi dibuelela, anyi ku tshihela. Kadi Nzambi udi mulumbuludi, udi ubandisha mukuabo, udi uhuekesha mukua-bo." (Mis. 75:7-8) Nzambi wakelela Bena Isalele mikenji mijalame mu mei â: "Muntu kikadi munkatshi muenu udi utambisha muan'andi mulume anyi mukashi mu kahia, nansha mutempi wa mbuku, nansha muena dijimbu dia bilengulengu, nansha muena muhongo, nansha muena buloji, nansha mutendeledi wa bakishi, nansha muena lubuku lua muzangu. Muntu yonso utu wenza malu au udi bu tshintu tshibi ku mesu kua Yehowa." (Dut. 18:10-12) "Ha bule hau hadi mbua, ne bena muhongo, ne bena masandi, ne

bashihianganyi, ne batendeledi ba mpiangu, ne muntu yonso udi umanya ne udi ushima mashimi.” (Bauk. 22:15) “Kanubuelakanyi ne bena muhongo anyi batempi ba mbuku, kanubakebi bua kudinyanga kudibo, meme ndi Yehowa Nzambi wenu.” (Lewitiki 19:31) “Hanuambilabo ne, Yai bienu kudi bena muhongo ne kudi batempi ba mbuku badi bakula biakulakula, andamunai ne; Tshisamba katshiena ne bua kuya kudi Nzambi watshi, anyi? Netshiye kukebela badi ne muoyo diakalengele kabayi bambe mei adi makanangane n’abi, munya wa dinda kawena wikalaku bualu bua tshisamba etshi. “Bikalabo kabayi bakula mudi df edi diamba, munya kawenaku bua bualu buabo.” (Yeshaya 8:19-20.)

Haudi ubala kakanda aka, Nzambi udi wakula n’ebe, ukusengelela bua wewe kukudimuna mutshima webe, ne kulekela malu audi wenza mpindiu, kadi nyuma mubi wa nkuvu udi uyikila ku ditshu diebe ukuhumbisha ne mpata, bua wewe ulekele dishindika dilelela, ne udi ūsha mutshima webe ne buowa. “Bana betu, balunda banyi, buloba buonso nebuambe tshinyi binakudimuna mutshima wanyi? Nebienzeke tshinyi hangikala tshiyi nya kuja maja anyi kubuela ku masanka a hanshi ha buloba? Nganji kuindila makelela anyi lumingu ludi ku mpala. Nganji kuebeshu mbayanyi, anyi tatu, anyi muan’etu. Nganji kubaka mukashi anyi kuheta mudimu. Ha mutu ha kutangila bubanshi bunene budi mu Yesu Kilisto, ditalala dimpe diandi, disanka diandi dia kashidi, butumbi buandi, muoyo wa tshiendelele mŭle tente ne disanka dinene; udi utangila anu bintu biudi ne bualu bua kushiya, biudi mua kuhidia biwasua ne Yesu alue mu mutshima webe. Kadi mona, ditshina dia bantu ne ditshina dia lufu bidi bikuvuisha muhika wa Satana . . .” bua asungile bonso bakalamibua kashidi mu buhika anu bua ditshina dia lufu. (Ebelu 2:14-15.)

Meji adi akuambila bua kulayidila bulunda buebe ne Yesu, adi akolesha mutshima webe tō ne haluau mukole bu tshihusu tshia nkuvu.

5. **NKASHAMA** udi nyama wa lonji ne tshikisu. Mutshiaudi ne tshiji bidi bitamba mutshima webe wa buntu, ne misangu yonso malu â adi afikishangana ku dishihangana. Udi mua kuidikisha kukokeshwa mutshima mubi, ne udi mua kûkokeshwa bulelela, kadi dituku dikuabo neutema bikole bu tshingoma tshia bombe. Bidi bimpe witabushe ne ulombe kudi Yesu akumushile mutshima eu. “Mpindiu kanuikadi ne tshiji.” (Genese 45:5) “Lekela kufua tshiji, uhidie kuikala ne njia. Kunyingalashi mutshima webe, bualu ebu budi mua kukuenzeshwa anu bualu bubu.” (Mis. 37:8) “Tshiji tshidi tshikole, ne lukuna ludi bu mai a bungi, kadi muntu kai udi mumanye mua kuimana ku mpala kua mukau?” (Nsu. 27:4) “Kukuatshi tshiji mu mutshima webe lukasa; bualu bua tshiji tshidi tshilala mu tshiadi tshia bahote.” (Muambi 7:9) “Kadi kata-taka nudiumushile tshiji ne mukau . . .” (Kolosai 3:8.)

Ba bungi bakuidikisha kutekesha tshiji tshiabo mu kunua kua maluvu anyi kudisombuella; kadi maluvu adi lulengu lubi lua nyoka. Bala Dutelenome 32:33. Disombuella didi dimpe kudi muena mutshima mubi.” Kadi Nzambi wakamba ne, “Busombuedi mbuandi.” Yesu wakuamba ne, “Sua mukuenu bu mûdi mudisue, Suai badi n’enu lukuna.” Nzambi wakatulaya dibuikidila dia mibi yetu, bituabuikidila banga bantu baku-tuenzela bibi.

Mutshima mubi wa kanyinganyinga udi kabidi bubu ku mesu kua Nzambi. Lukuka ludi lufila muntu ku nvita, bua kuhuekesha mashi, lutu luikala kabidi mu mutshima wa muntu. Ke bualu kai, yeye nkayandi nea-teke ditalala dia bushuwa mu mitshima yetu bituasua kuikala n’andi.

**NYOKA** wakadinga Eve mu budimi bua Edene. Waku-shiha bulunda ne diunvuangana dia bantu ne Nzambi. Satana — “Muanjelo-Muhuekesha” wakûla tente ne mukau bua Adama ne Eve (hakabamoneye basomba ha buloba ne bunvuangana bimpe ne Nzambi ha mutu ha diabololo-Lucifer). Bua mukau, Satana wakashindika bua kubanyanga ne wakenza bu muakasueye, waka-

nyanga bulunda bua bantu ne Nzambi. Mukau wa mushindu eu ne lukuka bidi kabidi mua kuikala mu mutshima webe, bidi biba disanka diebe. Bidi binyanga ditalala diebe, hawamona bakuabo basomba bimpe basanka.

“Mukau udi ne bukole bu muaba wa bafue.” (Mis. 8:6) Udi uteka meji mabi mu mutshima, unyanga disanka dia bakuabo, utu wafila bantu tô ne ku dishihangana. Mu mabaka makuabo bitu nunku kabidi. Udi tshibangidilu tshia dikenga, ne lukinu ha buloba buonso, mu malu a bu ngenda-mushinga (commerce) anyi malu makuabo. Nansha bena mudimu ba Nzambi, bambi ne bampasata kabatu batamba malu â nansha, ne bua kuenza bimpe badi ne bua kudimuka bua bikale anu ne meji a buowa, ne mudimu wabo kawikadi ne mukau (meji mabi a diabololo); hikala Nzambi wenza mudimu wandi bimpe ne mukuabo, kuikadi n’andi mukau.

**LUDIMBA** ludi ludia buloba ne ludi lulesha kualakana. Lukuka lua biuma, muji wa malu mabi onso. (1 Tim. 6:10) Udi mua kumona ndimba mikuabo imina nsua, nansha lukama yûkuta hehi ne kuhandika. Muntu mualakanyi kena ubulula tshianza tshiandi bua kukuatshisha bahele ne badi bakenga, kadi udi utshiunzulula anu bua kuidikisha kuheta, mu mishindu yonso mimpe anyi mibi, mabanshi onso a ha buloba, nansha biobi bidibue kudi bishi ne dimoma. Yesu wakamba ne, Kanubutshidi bintu bienu hanshi ha buloba hadi bishi ne dimoma bibibihisha, ne hadi bivi babumbula nsubu, babiba. Mutshima webe kabidi udi kudi bintu bia mu tshibutshilu tsiebe.” (Mat. 6:19-21)

Akana ne nsubu wandi mujima bakafua bualu bua wakasua ngolo ne mpalata, mabue a mushinga mukole ne bilulu bimpe. (Yoshua 7) Yudasa Isakaliote, muyidi wa Yesu, wakadiowa bualu bua lukuka lua mpalata luakamuvuisha mutungidi wa Mukelenge ne Muyishi wandi. Mpalata anyi ngolo kabiena bibi nansha, kadi lukuka luabi lutu luikala mu mutshima wa muntu ke ludi lubi. Binunu ne binunu bia balume ne bakashi

ba mishindu yonso, ba bisamba bionso badi banyanga mibidi yabo anyi ya bana babo bua disua dia kuheta nfualanga ya bungi musangu umue, mu kutua kua mubela ne kudia mpiku ya nfualanga ya bungi. Disua dia kulua mubanshi musangu umue ditu difilangana misangu yonso anu ku dishihangana anyi kudiowa. Lukuka lua nfualanga ne kualakana bidi nshila umue ne dinanga dia butumbi ne bukokeshi.

Bantu ba mushindu eu badi babenga bansanto batu balonda Yesu ne dikima dionso, badi kabayi balonda nzambi mikuabo. (Mk. 9:38) Yesu udi wamba ne, "Nudimuke, kanukumi mitshima ku biuma, bua muntu kena ne muoyo bualu bua bungi bua bintu bidiye n'abi. (Lk. 12:15) Monai lusumuinu lua mubanshi muhote: "Budimi bua muntu mubanshi buakakuama bintu bia bungi. Wakelangana meji munda ne, Ngenze tshinyi? Bualu bua tshiena ne muaba wa kusangishila bintu bianyi. Mona, wakamba ne, Nengenze nunku: Nensa-sule mayeba anyi nengase makuabo matambe a dia-mbedi bunene, nensangishilemu maminu anyi onso ne biuma bianyi, ne nengabile mutshima wanyi ne, Mutshima wewe udi ne bintu bia bungi bibuta bia bidimu bingi, wikishe, udie, unue, usanke biebe. Kadi Nzambi wakamuambila ne, Muhote, butuku ebu mene badi balomba muoyo webe, bintu biwakulongolola ne-bikale kudi nganyi? Muntu udi udibutshila bintu biandi kayi mubanji ku mesu kua Nzambi udi nunku." (Lk. 12:17-21) "Nebienzele muntu tshinyi biaheteye buloba buonso ne kujimisheye muoyo wandi?" (Mk. 8:38) Yesu wakabambila ne, Kanudikengeshi ne muoyo wenu bua bintu ebi bionso binuadia . . . muoyo udi utamba bia kudia . . . Bualu bua bintu ebi bionso bantu ba ha buloba ebu badi babikeba. Tatu wenu udi mu diulu udi mumanye binudi n'abi dikenga. Kadi kebai bukelenge bua Nzambi, nunku nebanuhe bintu ebi bionso . . . Bualu bua muaba udi tshibutshilu tshiebe muoyo webe udiku kabidi."

8. **SATANA** tatu wa mashimi, ne wa bena mashimi mene, udi muenzeshi wa malu mabi onso. Nyeye mene

mukokeshi wa mutshima. Yesu wakuamba ne, “Nuenu nudi bana ba diabololo tatu wenu, nudi basue kuenza bu mudi nkuka ya tatu wenu. Ku tshibangidilu yeye wakadi mushihianganyi, katu wimana mu bualu bulelela, bua yeye kena ne bualu bulelela munda muandi. Hambeye di dia mashimi, udi wamba malu andi mene; bua yeye udi muena mashimi, ne udi tatu wau.” (Yon. 8:44) Didinga dikese ne dia malu adi malenguludibue didi kabidi anu bu didinga dinene. Kudi mashimi a mukana, mashimi mafunda, manga adi a kuenza. Muena lubombo udi muena mashimi bualu bua udi udifila kudi Nzambi udi kayi udinga.

Muena kuitabusha kena mua kudinga tshiendelele. “Bituamba ne, Tudi ne buobumue n’andi hatutshidi tuenda mu mfdima, tudi tushima, ne katuena tuenza bualu bulelela.” (1 Yon. 1:6) “Ha bule hau hadi mbua ne bena muhongo ne bena masandi ne bashihianganyi ne batendeledi ba mpingu ne muntu yonso udi musue ne udi wamba mashimi.” (Buak. 22:15) Munkatshi mua bintu muanda mutekete bidi Yehowa munyoke, tudi tusangana mudingidianganyi (Mushiminyinyanganyi) ne muena mashimi. (Nsu. 6:16-19)

**MUTOTO** udi tshilejelu tshia meji a buntu (muoyo mukese) atu ikala munda mua muntu yonso. Mu tshindidimbi etshi, udi mufike, mubi, munyanguke, misangu mikuabo muladika kudi mibi milunguluke, ne mimanyibue; mufofomesha (Mutoto) ne munyanga mushindu udi muen’au kayi kabidi mua kumanya tshidiye wenza. Meji a mabi a buntu misangu mikuabo atu matalale, minga misangu atu matatshishibue. Atu atuisha muntu ku kubi buandi hadiye musue kububui-kila. “Kadi Nyuma udi wamba hatoke to ne, Halua bikondo bia kunshikidilu ha buihi, bantu bakuabo neba-lekele ditabusha diabo, balamata ku nyuma idi ihambuisha ne ku mayisha a bademona; bualu bua lubombo lua bantu badi bamba mei a mashimi, badi boshibue mu muoyo-mukese wabo ne tshiamu tshihie ne kadilu.” (1 Timote 4:1-2) Nunku udi anu bu tshiamu tshiosha mu kahia kakole. (Ebelu 10:22).



**10. DISU DIA NZAMBI** didi dimona tshionso tshidi tshienjibue mu mutshima. Nansha tshintu tshimue ka-tshiena mua kusokoma ku disu diandi dikole; bua bualu ebu yeye utu wamona meji onso tô ne malu adi muntu utshinka (utekemena) kuenza.

**11. NDIMI MIKESE YA KAHIA** ku butshika bua muoyo idi ilesa dinanga dia Nzambi didi dinyunguluka mutshima mubi. Bulelela Nzambi udi munyoke bubu, kadi udi mutunange ne kena musue lufu lua muntu mubi, kadi mbimpe atonde ne ahete muoyo. Ndimi mikese ya kahia, idi ituambila kabidi bua mashi a Yesu Kilisto-Muana wa Mukoko wa Nzambi utu umusha mibi ya ba ha buloba.

**12. MUANJELO** udi tshilejelu tshia di dia Nzambi. Nzambi udi musue kuakula ne mulume anyi mukashi udi muhungile ne bujitu bua bubu, bua atonde; munya ne dinanga dia Nzambi bibuele mu mutshima wandi. Nzambi udi uyikila n'ebe, mulunda wanyi, ne mukanda eu.


**13. NKUTSHI** udi nyunyu muimpe wa ditalala. Udi tshilejelu tshia Nyuma Muimpe wa Tshijila, Nyuma wa bulelela. Nyeye watuisha ba ha buloba bua bubu ne bua buakane ne bua dihila. Udi ha mbelu ha mutshima bualu bua kena mua kusomba ku muaba udi ne bukoya.

Bikala tshindidimbi etshi tshileshe mushindu wa mutshima webe, nkukushadile anu bua kubikila Mukelele. Umunzuluile mutshima webe, ne munya wa Di diandi ubuelemu. "Itabusha Mukelenge Yesu, nunku neusungidibue." Nzambi udi musue kuenza bu muakalayeye bua kukuandamuna mutshima webe, kukuhesha muoyo muhia-muhia muikale ne Nyuma Muhia-muhia. Tshindidimbi tshibidi netshileshe kabidi bualu ebu.

---

### TSHINDIDIMBI TSHIBIDI

Tshindidimbi tshibidi tshidi tshileshe mutshima wa ditonda ne udi ubanga kukeba Nzambi. Muanjelo udi ukuata, muele, "Bualu bua di dia Nzambi didi ne muoyo ne bukole, didi dihita muele wonso musakisha nseke ibidi kutua, didi ditubula tô ne ku dihandulula dia muoyo ne



**MUTSHIMA MUTUISHIBUE KU BUBI WAMBA  
KUKUDIMUKA**

nyuma, ne dia manungu ne buongo bua mikuha, didi dijingulula lukasa meji ne malu adi mutshima musue kuenza." Ebelu 4:12. Bantu badi ne bua kufua musangu umue, hashishe tshilumbuluidi tshilualua. Ebelu 9:27. Nunku Di dia Nzambi didi divuluisha muntu ne "Difutu dia malu mabi ndufu." Muntu mubi nansha udi kayi muena kuitabusha nebamuele mu dishiba dia kahia kakole kadi katema ne soufre mukole.

Muanjelo udi ukuata kabalubalu ka mutu mu tshianza tshikuabo. Tshintu etshi tshidi tshivuluisha muntu mubi ne tudi ne bua kufua bonso. Mubidi wetu eu, utudi basue bikole, utudi tuluatshika, tudisha, tulengesha ne tulama bua kushikisha nkuka yau yonso, neufue, neujimine, neudibue kudi bishi, kadi mioyo yetu ne nyuma yetu ne bikale ne muoyo tshiendelele ne nebilumbalule dituku dikuabo ku tshilumbuluidi tshia Nzambi.

Aha tudi tumona muntu mubi ubanga kunvua lumu lua Nzambi, unzulula dinanga dia Nzambi mutshima wandi. Nyuma wa Tshijila udi ubanga kutokeshama mutshima mufikisha kudi mibi. Munya wa Nzambi udi ubuela mu ntempelo ne wihatamu midima yonso. Nyama ya mishindu yonso idi ileshe bubi idi inyema mpi ndiu. Bua bualu ebu, muan'etu mubadi, itabusha Yesu — Munya wa ba ha buloba — abuele mu mutshima webe, ihate midima ne midimu mibi bidimu, bu mudi tshindidimbi etshi tshikulesha. Yesu wakamba ne, "Ndi munya wa ba ha buloba, wandonda kena wendakana mu midima kadi neikale ne munya wa muoyo." (Yon. 8:12) Kuena mua kudiumushila midima idi mu mutshima ku bukole buebe nkayebe anyi ku meji a bakuabo nansha. Mushindu muimpe wa bushuwa ne wa lukasa ne mujalame tshishiki wa kuihata n'au midima, udi anu wa kuitabusha munya ubuelemu. Bualu bua midima idi mibi yetu. Bulelela ngondo ne mitoto bidi bitutokeshila kakese hadiku midima, kadi habanda diba, midima ne minda mikuabo idi ikenka idi ijima.

Yesu udi Dibue dia Bushuwa. Hakabuele Yesu mu ntempelo wa my Yelushalema, wakihata bantu bonso bakadi bahanamy ngombe, mikoko ne nkudimba, waka-

tonkola mesa a bashintakashi ba nfulanga wamba ne, “Nebabikile nsubu wanyi ne, nsubu wa kutendelelamu Nzambi, kadi nuenu nuakamuvuisha bu muaba wa banyengi.” (Matayo 21:13).

Mutshima webe wakuenjibua bua wikale ntempelo wa Nzambi ne nsubu wandi. Yeye udi musue kusombamu, kumulengsha, kumûsha tente ne munya wandi ne dinanga diandi ne disaka diandi. Yesu kakalua anu bua kutubuikidila mibi nkayai nansha. Wakalua bua kutuhesha budishikaminyi ne ditamba dia mibi. “Bianuha Muana budishikaminyi nenuikale badishikaminyi bulelela.” (Yon. 8:36).

### TSHINDIDIMBI TSHISATU

Tshindidimbi etshi tshidi tshitulesha mutshima wa muntu mubi udi utonda bushuwa mene mene. Mpindiu udi ujingulula mibi yandi ya bungi, mikole ne mitambe bunene, yakenzeye ne yakafuila Yesu ha mutshi mutshiamakane.

Hadiye umona mutshi mutshiamakane udi muanjelo wa Nzambi ulesha, mutshi eu udi uhandu mutshima wandi munyingalale ne yeye udi utonda mibi yandi yonso ne mutshima wandi udi ne kanyinganyinga. Hajingululeye dinanga dinene dia Nzambi dileshibue mu Yesu Kilisto, dinanga edi didi dibuela mu mutshima wandi, udi ujingulula ne Yesu Kilisto — Muana wa Nzambi — wakalua bua kumusha mibi yandi bualu bua wakamufuila ha mutshi wa mulau.

Bu muakatutshibua Yesu, bu muakashibueye tshifulu tshia meba, bu muakahandika bianza ne makasa andi ku misonso (misumadi), bu muakafueye bua mibi yetu ha mutshi mutshiamakane, bidi binyingalasha muntu mubi nunku udi utonda bulelela. Habaleye Di dia Nzambi udi udimona bu mu ntalatala (lumuenu). Nunku udi ujingulula ne wakadi kule ne Nzambi ne wakashiha mikenji yandi misangu ya bungi. Udi unyingalala bikole, ne habululeye mutshima wandi ku mesu kua Nzambi ne binsonji ne muadi mukole, Yesu udi usemena hehi n'andi. Dinanga ne ditalala bia Nzambi bidi biûsha mutshima wandi tente hamanyeye ne mashi a Yesu Kilisto Muana wa Nzambi adi atulengsha



**MUTSHIMA MUNYINGALALE KU BUBI**

ku bubi buonso. (1 Yone 1:7) Yehowa udi hehi ne bantuu badi ne mioyo minyingalale ne udi usungila badi ne nyuma miketeke (mihungile) (Mis. 34:19). Mu Mukanda wa Nzambi tudi tubala ne, "Mona meme nentangile kudi muntu eu muhele ne wa mutshima muhukele udi uzakala bua di dianyi." (Yesheve 66:2b) Nyuma wa Tshijila udi umuambila bitekete mei a Yesu ne "Muan'anyi, ya talala . . . ' mibi vebe yakujimishibua." Matuku onso hatangileye ku mutshi mutshiamakane udi umona mashi a Yesu ahueka, ne udi witabusha ne bualu ebu buakenjibua bua bualu buanyi. Udi udiunvua muhehele ku bujitu bua mibi yandi bualu bua Yesu nkayandi wakatala ntatu ne makenga andi. Udi mumanye ne Yeye (Yesu mene) wakatahibua bua mibi yetu ne bua bienzedi bietu bibi ne Yehowa wakateka bubi buetu ham'bidi handi. (Yesheya 53).

Munya wa Nyuma wa Tshijila udi ula mu mutshima wandi, wakadi munyanguke ne mule tente ne midima diambedi. Udi usukula ne utokeshu to bu neige mu mashi a Yesu. (Yesheya 1:18) Nyuma nkayandi udi utujinguluila ne tudi bana ba Nzambi. (Lomo 8:18) Udi mushindike ne "witabusha Mukelenge Yesu, kena ufua kadi neikale ne muoyo wa tshindelele."

Bualu bua mu Yesu "tudi ne kuhikudibua kuetu ku-diye bua mashi andi, ne kubuikidibua kua malu mabi etu bu mudi bubanshi bua ngasa wandi." (Efeso 1:17) Nkuka mibi ya mubidi yakushiya muaba bua kuikala ne disua dia Nzambi ne kumuenzela mudimu. Yeye wakatusua diambedi. Ha mutu ha kusua buloba ne masanka abu, mpindiu muntu eu udi musue anu Nzambi.

Mu tshindidimbi etshi, nyama ya bubi idi ha bula ha muoyo wa muntu eu. Satana kena musue kushiya muaba wandi wa diambedi ne udi utangila ha nyima utekemena kuhingana kabidi. Bua bualu ebu Yesu udi utubela bua tuetu kudimuka ne kutantamena diaboloo bua atulekele.

---

### TSHINDIDIMBI TSHINAI

Tshindidimbi etshi tshidi tshilesha muena kuitabusha wakumana kuheta ditalala dimpe ne buhikudi bua

mulambu wa Mukelenge ne Musungidi wetu Yesu Kili-sto. Mpindiu kena uditumbisha bua bunga bualu anu bua mutshi mutshiamakane wa Mukelenge wetu Kili-sto. (Galatia 6:14).

Yesu wakafua ha mutshi mutshiamakane bue tuetu bakadi mua “kufua ku malu mabi tuikale ne muoyo wa ku buakane.” (1 Petelo 2:24) Muena kuitabusha udi mushihubue ku milou ne nkuka ya ha buloba. Mu Galatia 5:16 tudi tubala ne, “endai mu Nyuma Muimpe nunku kanuena nulonda lukuka lua mubidi.” “Bituikala ne muoyo bua Nyuma tuende bietu bua Nyuma kabidi.” Galatia 5:25.

Mu tshindidimbi etshi tudi tumona mutshi waka-suikabo Yesu hakamuvulabo bilulu. Tudi mua kumona kabidi nfimbu (mukaba) ne binga bintu biakamukumabo n’abi ne tshikisu, bualu bua dikenga dia ditalala dietu diakadi ham’bidi handi. Wakakengeshibua bua mibi yetu. Mukelenge Helode ne bantu bandi bakamu-seka: bakamuluatshisha bilulu bikunze, hakamukumabo, bakamuasa tshifulu tshia meba ku mutu, ha muaba wa tshifulu tshia butumbi tshia ngolo.

Bakateka tshitete-tete (roseau) mu tshianza tshiandi tshia balume mu muaba wa dikombo dia bukelenge ne bakatua binu ku mpala kuandi bamuseka, bamba ne “Muoyo Mukelenge wa Ba-Yuda.” Bakamuela mate (lute) ham’bidi; bakamunyenga tshitete-tete ku bianza bakamukumatshi ku mutu. Hakamusekabo ne tshikisu nunku bakaya n’andi bua kumushihabo ha mutshi mutshiamakane.

Bena kuitabusha ba bungi badi anu ne dina dia buena kuitabusha baya mu nsubu ya Nzambi, badia bidia ne maluvu, bimba misambu, kadi bikale bashiha Musungidi wabo kabidi ku bienzedi biabo bibi. “Bonso badi bangamba ne Mukelenge, Mukelenge, kabena babuela mu bukelenge bua mu diulu, kadi anu udi wenza bu mudi Tatu wanyi udi mu diulu musue,” (Matayo 7:21-27).

Mu tshindidimbi etshi mene, tudi tumonamu tshibombi tshia Yudasa wakatungila Mukelenge Yesu ne wakamuhana ku mpalata makumi asatu bua lukuka lua

**Mushihibue ne  
Yesu. Gal. 2:20**

Tudi bafue ku  
bubi, kadi tudi  
ne muoyo kudi  
Nzambi mu Kili-  
sto Yesu.

Lomo 6:11.



**MUSHIHIBUE NE KILISTO**



biuma luakamukuata ne luakafikisha mutshima wandi ne luakamufofomesha mesu.

Tshimunyi tshia kahia ne nkanu mbiakakuata n'abi masalayi Yesu butuku. Bakelela kazaku kandi nshobo, bashikisha di dia Nzambi kudi muprofete ne, "Bakabanyangana bilulu biandi ne bakelela kazaku kandi nshobo." Bakavula Yesu bilamba bionso ne bakamuhidia bamba ne, "Katuena basue muntu eu ikale Mukelenge wetu."

Bantu bonso badi basue kuheta masanka â kudi Nzambi; nvula ne munya, kadi kabena basue bukelenge bua Nzambi. Banga batu bamanya Nzambi anu diba dia ntatu ne dikenga.

Masalayi akatubula lubadi luandi ne difuma diau. Mashi ne mai biakahueka. Diambedi tshitata katshiyi tshianze kusama, Petelo wakahidia Yesu misangu isatu ku mesu kua nsongakashi muhika, kadi ku nyima wakatonda udila bikole! Udi utangalasha lumu lua Yesu ku mei ne ku bienzedi biebe, anyi? Anyi udi ufua bundu ku mesu kua bantu? "Muntu yonso wangitabusha ku mesu kua bantu, meme nemuitabushe kabidi ku mesu kua Tatu wanyi udi mu diulu. Kadi muntu yonso wampidia ku mesu kua bantu, meme nemuhidie kabidi ku mesu kua Tatu wanyi udi mu diulu." (Matayo 10:32, 33).

Yesu wakamba kabidi ne, "Muntu yonso udi kayi wangata mutshi wandi mutshiamakane, udi kayi undonda meme, kena ukumbana bua kuikala muyidi wanyi." (Matayo 10:38) Disanka kudi badi bimeane ha Dibue edi Yesu Kilisto!

1. "Dibue dia tshinyemenu, Tshisokomenu tshianyi Anu mashi a Yesu, Akumatshila hanshi, Antokeshile meme, Ku bukole bua bubu.
2. Hambuikilabo mesu, Hashika muoyo wanyi Ne hanamona kulu, Nzambi mulumbuludi Dibue dia tshinyemenu, Unsokoke kashidi Dubue dia tshinyemenu, Unsokoke kashidi.

## TSHINDIDIMBI TSHITANU

Monai mutshima mulengeshibue, mujidila, wa muntu mubi musungidibue ku luse lutambe lua Nzambi. Mutshima eu wakulua ntempelo mulelela wa Nzambi, nsubu wa Nzambi Tatu, Muana ne Nyuma wa Tshijila, bu mudi mulayi wa Mukelenge wetu Yesu Kilisto. "Yesu wakamukudimuna ne, Biansua muntu, nênze dî danyi; Tatu wanyi neamusue, Tuetu netulue kudiye, netuikale n'andi." (Yone 14:23) Mu Yesu Kilisto, Nzambi udi utumbisha, usankisha ne ulongolola muntu. Mu muaba wakadi nyama misombe ikokeshibua kudi Satana, tatu wa mashimi, tudi tumona mpindiu Nyuma wa Tshijila usombamu.

Ha nyima ha mutshima eu mumane kuikala nsubu wa bubi, udi mpindiu mutshi muimpe wa mamuma a Nyuma bu: Dinanga, Disanka, Ditalala, Kudihuekesha, Buhole, Buimpe, Lulamatu, Lutulu, Buakane, Bulenguludi bua masanka mahite ne manga malu adi mimpe ku mesu kua bantu. Mpindiu ukadi ditamba dia mutshi wa tumuma, ne didi dikuama mamuma mu Yesu Kilisto. Bualu busokoka budi bukuamisha muntu eu mamuma budi nunku: Yeye udi munda mua Kilisto ne Kilisto ne mikenji yandi bidi munda muandi. (Yone 15:1-10) Bualu bua udi mûshibue tente ne Nyuma wa Tshijila, udi ne bukole bua kutamba mubidi ne nkuka yau, ne kushiha muntu wa kale udi munda muandi. Bua bukole bua Nyuma Muimpe buakubuela munda muandi, yeye nênde mu Nyuma. Kena ne muoyo anu bua kumona, kunvua ne kulenga nkayaku, kadi udi n'au mu ditabusha; bualu bua ditabusha dia Yesu didi kutamba kua malu a ha buloba (Yone 5:5) Udi ne ditekemena dilelela, didi ne muoyo mukoleshibue mu ditekemena dilelela, didi ne muoyo mukoleshibue mu ditekemena dia butumbi halua Mukelenge wetu Yesu Kilisto tshiakabidi. Udi ne muoyo mu Dinanga dia Nzambi tshiendelele.

Badi ne mitshima mitoke badi ne disanka bua bobo nebamone Nzambi. (Mat. 5:8) Mukelenge Davidi wakadi ne bubanshi bua bungi. Wakatamba bena lukuna

Dinanga  
Disanka  
Ditalala  
Kudihuekesha  
Buhole

Buimpe  
Lulamatu  
Lutulu  
Kudikanda  
Nyuma Muimpe



**NTEMPELO WA NZAMBI**

bandi bukole. Kadi mu malu â onso wakajingulula ne tshintu tshikuabo ntshimushale. Nunku wakalomba ne, “Umpingashile disanka dia luhandu luebe, unjadike — mutshima wa kuenza bu mu dinanga diebe.” (Mis. 51:12) Muntu umue munkatshi muetu kena mua kulengesha mutshima wandi, nansha umue kena mua kudifukila mutshima muimpe munda muandi. Anu biatondeye mu bushuwa bu muakalomba Davidi bua Nzambi amuhe mutshima muhia-muhia, bualu ebu budi mua kuenjibua. Nzambi udi musue kûvuisha muhia-muhia. Kulabakana mu dilumbulula diebe anyi mitshihu ya tshianana kakuena mua kuvuisha muoyo webe nsubu muimpe wa Nzambi; kadi Yeye udi ukeba kutu-kuatshisha ne wakalaya ne, “Nemiamine mai makane ham’bidi henu, nenuikale bakane; nenulengeshe ku bukoya buenu buonso ne ku mpingu yenu yonso. Nenteke mutshima muhia-muhia ne nyuma muhia-muhia munda muenu, nennumushile mutshima wa mabue (mukole) unudi n’au munda muenu, nennuhe mutshima muakane. Nenteke Nyuma wanyi munda muenu; nennuenzeshe mu mikenji yanyi, nenuyienze.” (Yehezekele 36:25-27) Edi ndihungila Dihia-Dihia diakatulongoluela Nzambi ne diakasuikeye ne mashi a muan’andi Yesu Kilisto.

Mu tshindidimbi etshi tudi tumona muanjelo umu-eneka tshiakabidi. Banjelo mbafundila bua kukuatshisha badi baheta muoyo wa tshiendelele. Badi kabidi ne bukenji bua kulama badi batshina Nzambi. (Misambu 34:8; 91:11-12; Danyeke 6:22; Matayo 2:13; Bienzedi 5:19; 12:7-10).

Diabolo udi umueneka kabidi mu tshindidimbi etshi. Udi hehi ne mutshima bu muntu udi walamina tshikondo tshiakane bua kuhingana mu nsubu wandi wa diambedi. Bua bualu ebu, Mupostolo udi utubela bua tuetu kudimuka ne kutendelela bualu bua “Muena lukuna wetu, diabolo mene, udi wendakana bu nyama wa ntambue ukungula, ukeba bantu ba kudieye.” (1 Petelo 5:8) Misangu ya bungu utu wamueneka bu muanjelo wa munya, ulenduisha bena kuitabusha bakuhanga kudimukila nkuka ya ha buloba ebu. Bua

budimu buandi utu wadinga tō ne bena kuitabusha balelela badi munkatshi mua basungidibue. Kadi bulelela bituatantamena diabolo, yeye neaye kule kayi hehi n'etu. (Yak. 4:7).

---

### TSHINDIDIMBI TSHISAMBOMBO

Tshindidimbi etshi tshidi tshia muntu ukadi uhambuka mu nshila wandi wa ditabusha. Disu diandi dimue didi dibuikila bualu bua ukadi ubanga kulala mu muoyo wandi wa buena kuitabusha hadi disu dikuabo dimutangila yeye mene.

Munya wandi wa munda ukadi mufikuluke, ne mu muoyo wandi bimanyinu bia budishikaminyi mu dike nga diandi ne Yesu kabitshiena bimueneka bimpe to. Mateta adi mamunyunguluke nseke yonso, ne udi uhanga mua kuâtamba. Ha mutu ha kunvua di dia Nzambi, ukadi ubanga kunvua mei a budimu ne milayi ya mashimi bia mutetshianganyi. Misangu mikuabo, udi mua kuya mu nsubu wa Nzambi bua kusokoka dinanga diandi dia malu a ha buloba, hikaleye mu Ekelezia; kadi dinanga dia Nzambi diakumana kukehela mu muoyo wandi. Meji andi akadi matahuluke ku ngenyi ya bungi. Ukadi ubanga kudiangana bulunda ne buloba hatshidiye udiamba ne, Ndi muitabushe Nzambi, mu muoyo wanyi. Mutoto wa muoyo-mukese wa munda muandi wakutekesha dinkenke diau. Katshiena wambula kabidi mutshi mutshiamakane wandi ne disanka, wakulua (mutshi eu) kudiye bu bujitu bukole ne kabuyi bumusankisha. Ditabusha diandi dikadi dikanka, katshiena unvuangana kabidi ne Nzambi mu ditendelela; wakuhanga ditekemena ne wakulengulula muoyo wandi; ukadi ushila mutetshi ne bena lukuna (baluissha) bandi muaba hehi ne muoyo wandi ku kakese ku kakese . . . ukadi usanka bua balunda ba ha buloba kutamba bena Kilisto.

Meji a Kaiba (paon) adi alesha kudisua, adi akeba kuhinganamu. Muena kuitabusha eu, misangu mikuabo ukadi mumane kuhua muoyo ne wakasungidibua ku ngasa. Ne mona mpindiu ukadi ulua kabidi muena kudisa. Bunuavi bua maluvu bukadi bukokola ku



**MUTSHIMA MUTEYIBUE NE UTATAKANA**

tshibi tshiandi bukeba tshibuelelu. Diambedi bidi bibanga bitulu, bitulu, ku nyima hatoke tō. Tshilejelu: hadiye ne balunda bandi banangi ba malu a ha buloba mu disanka, hikaley ne bundu anyi buowa bua kabamuambi ne muhange malu, anyi mutekete anyi katu usomba ne bantu, nunku diabolo udi umuambila ku ditshu ne, Musangu umue eu buena Nzambi buebe kabuena bunyanguka to. Tuluvu tukese etu tudi bualu, anyi? Kunua tukanya musangu umue kudi bualu anyi? Kena uvuluka kabidi ne, tusulu tukese tudi tushikila ku mai manene a dibutuka dia tshiendelele. Yesu kakitaba kulenga tshintu tshimue tshiakadi ma kunyanga mubidi wandi ne kumuvuisha muhika watshi. Badi bamulonda ha buihi bikale muomumue. Kadi mu tshindidimbi etshi muntu eu kena nunku to. Meji mabi ne nkuka ya mibidi bidi biunvuika kudiye mpindiu. Misangu mikuabo udi biandi mua kunvua bilele (mineku) bia mpata abi bimusankisha, kuya ku miaba ya maja ne minga miaba idi kayiyi mimpe, ubanga kuteketela muluisha diabolo), utshinka ne ke mudi hanu nunku. Bubi bua musangu umue kabuena bubi nansha. Mushindu eu ngudi Satana uheta tshibueledi bua kukokeshu muaba wandi wa kale tshiendelele.

Bulelela, katuena ne tshitudi mua kuenza bikala nyuma mibi ne meji mabi binyunguluke ku mitu yetu, kadi tudi bahile bituitabusha bua kushalabi munda muetu ne bituabilekela biela makele mu mioyo yetu, ne bitoyilamu malu mabi abi. Bituahesha diabolo kantengenene, yeye neakuate ku tshianza tshionso bua akoke muoyo ne nyuma mu Ngena wa kashidi. Bua bualu ebu Nzambi udi utubela bua tuetu kunyema nkuka ya buhiankunde, katusanki bua bubi nansha bua mushindu kai. Tunyemene kudi Yesu, Muhikudi ne Tshilobo tshietu.

Muntu unudi numona utua muoyo kele mu tshindidimbi etshi, udi tshilejelu tshia baseki ne baluisha (bena lukuna) ba bena kuitabusha. Ku mishiku yabo ya tuseku ne ndimi yabo ya bijianu badi bataha mitshima ya bena kuitabusha. Mutshima mutetuke (mukuatshike ne maluvu) kawena mua kukandamana ku malu a

mushindu eu. Muena kuitabusha wetu eu ukadi ubanga kutshina bantu ku mpala kua Nzambi. Ditshina dia bijianu ne tuseku biakumuluisa muhika wa bantu ne udi unyema Nzambi. Meji mabi ne tshiji bidi bibanga kumueneka tshikondo tshia ditata ne tshia tshinyangu ne bikeba kubuela mu mutshima eu. Nyoka wa mukau udi umueneka hadi bakuabo ne bubanshi anyi batungu-nuka kumutamba yeye. Bikala diabololo usangana tshibi tshiunzulula kakese, udi ubuesha muji wa lukuna ne kudisua.

Mbitekete bua kubuesha dinanga dia biuma mu mitshima yetu, bituikala katuyi tuvuluka dimanyisha dia Mukelenge Yesu hakambeye ne, “Nudimuke, nute-ndebele Nzambi nunku kanuhonyi mu mateyi” Mat. 26:41) 1 Kolinto 10:12 udi utuambila ne “Nunku muntu udi wela meji ne ndi muimane adimuke bua kahonyi biandi. Luatai bintu bionso bia nvita bia Nxambi bua nuenu numanye mua kuimana bakandamane ku mpala kua mateyi a Diabolo. (Efeso 6:11-18).

#### TSHINDIDIMBI TSHIA MUANDA MUTEKETE

Tshindidimbi etshi tshidi tshilesha mushindu wa mutshima muhingane ku malu mabi. Muntu eu wakadi mutokeshibue ne wakamana kulabula diha dia Nzambi. Wakaheta Nyuma wa Tshijila ne hashishe wakumuka ku nshila muimpe. Tshidi tshilesha kabidi mushindu wa muntu udi kayi muanji kukudimuna mutshima wandi ne udi kayi mudifile kudi Nzambi. Yeye mumane kunvua Lumu Luimpe utshidi ukolesha mutshima wandi ulamata ku bubu.

Yesu nkayandi wakulesha mushindu wa muntu muhingane ku nyima mu malu mabi mu Luka 11:24-26. “Haluhuka nyuma wa bukoya munda mua muntu, nyuma udi wendakana mu miaba idi kayiyi mai, ukeba ha kuikisha; biahangeye mua kuhamona, yeye udi wamba munda munda ne Nempingane mu nsubu wanyi unakululuhuka. Halueye, udi usangana nsubu mukomba, mulengesha. Hashishe yeye udi uya biandi, udi wangata minga nyuma muanda mutekete idi imutamba yeye bubu, idi ibuelamu, idi ishikama; malu a muntu





7

**MUTSHIMA MUHAMBUKE NE MUKOLESHIBUE  
MU BUBI**

au a hashishe adi atamba a diambedi bubu.” II Petelo 2:22 “Bualu buakulua kudibo bu mudi lusumiunu lulelela luamba ne, Mbua muhingane ku bilushi biandi kabidi, ne ngulube mumane kuowa wakahingana kudi-bonda mu bitahikidi.”

Nvese ya mu mukanda wa Nzambi idi ituambila hatoke tō mushindu wa mutshima wa muntu muhingane ku malu mabi anyi wa muntu mubi udi kayi utonda mibi yandi. Bubi ne bukole buabu buakulua kusombamu bua kudia bukelenge mu mutshima eu. Mpala wandi ukadi mulue mubi anu bu mudi mutshima wandi. Nyuma wa Tshijila, nyunyu wa nkutshi wa ditalala udi umona bamuihata mu mutshima amu; bualu bua bubu ne Nyuma wa Tshijila kabiena mua kushala kaba kamue. Mutshima kawena mua kuikala luseke ntempelo wa Nzambi, luseke lubuebue lua diabololo. Muanjelo (tshifuanyikishi tshia Df dia Nzambi) udi umuka ne kanyinganyinga mu mutshima eu, utangila ku nyima mutekemene ne bumue muntu eu neudi mua kutonda mibi yandi bu muana mujimine. Luka 15:16-18: “Yeye wakasua kusha difu diandi tente ne bihusu biakadi ngulube idia. Kadi kakuakadi muntu wakamuha tshintu. Hakakatamukeye, wakamba ne . . . Nembike, nenyee kudi tatu wanyi nemmuambile ne, Tatu, naguenzela diulu bibi, nakuenza bibi ku mesu kuebe. Tshiena bianyi muimpe kabidi bua kumbikilabo ne, muan’ebe.” Hakamona tatu muan’andi utonda dihanganga, wakamubuikidiladi ne wakamuha budishikaminyi.

Kadi mu tshindidimbi tshietu, kamuena ditonda dilelela. Muntu eu kena uhingana kudi Nzambi bulelela mene mene nansha. Kena ulomba dibuikidila ku makasa a Yesu nansha. Bualu bua Nyuma kena ha buihi bua kumutuisha ku bubu buandi. Muoyo wandi mukese udi muoshibue ku tshiamu tshikunze, ne udi ulala tulu (muhole holâ). Udi ne matshu kadi kena unvua df dia Yesu didi dimusengelela.

Udi ne mesu kadi kena mua kumona dina dia Ngena dinene dibuluke ku makasa andi nansha. Kena ne

bundu mene bua kushala musangu mule mu bubu nansha. Satana udi mukelenge wa mutshima wandi. Udi musombamu bu nfumu mu nkuasa wa butumbi. Minga misangu muntu eu udi mua kunemekibua, udi udibikila ne umueneka bu muena Nzambi. Kadi udi anu bu lukita lulengesha ha mutu, “munda mualu mûle tente ne mifuba ya bafue, ne bintu bionso bibi.” (Mat. 23:27).

Mpindiu tatu wa dishima udi ha muaba wa Nyuma wa Bulelela. Nyama yonso, bubu bonso, budi ne nyuma mukuabo mubi, bikadi mu mutshima wandi mpindiu. Nansha biasueye kudivuisha mudishikaminyi kudi bantu aba bubu, kena mua kulua mudishikaminyi, bualu bua bantu aba bakadi bamane kumusuka ne nshinga. “Muntu wakuhetula mikenji ya Mose udi ufua, kayi mufuidibue luse, ku di dia bamanyi babidi anyi basatu; nudi nuela meji ne muntu neabadibue muakanyine dikenga ditambe misangu bungu munyi, nyeye wakadiata Muana wa Nzambi muinshi mua makasa andi, ne wakabala mashi a tshihungidi akadiye ujidibua n’au bu tshintu tshia tshianana ne wakuhenda Nyuma wa Ngasa?” (Ebelu 10:28-29; bala kabidi II Petelo 2:1-14).

Bikala tshindidimbi etshi tshifuanangana ne mu-shindu wa mutshima webe, mulunda wanyi kujangu-luki. Bikala Nzambi ne muoyo webe wonso. Yeye udi mua kukubuikidila mibi yebe yonso biwalua kudiye ne mutshima wa ditonda dilelela mene. Yeye muine udi ne bukole bua kuihata Satana ne balamatshi bandi tshindelele. Lua kudiye bu muakalua muena nsudi kudi Yesu umuambile ne “Biwasua udi mua kundengesha.” (Mk. 1:40-41) Kadi biwalunguluka ne kukolesha mutshima webe, biwasua mûdima ha mutu ha munya, kakuena ditekemena anyi dikuatshisha. Wakusugula lufu, ha mutu ha kusungula muoyo: “bualu bua difutu dia bubu ndufu.” (Lomo 6:23).

Aha tudi tumona mukoleshi wa mutshima wandi ku malu mabi usemena ha buihi ne lufu. Mubidi wandi udi mûle tente ne masama, muoyo mûle tente ne ditshina dia lufu lulualua. Lufu bialu luakulua diba dibi. Ma-sanka a bubu akujimina ne udi ne bua kumonangana

## TSHINDIDIMBI TSHIA MUANDA MUKULU

Tshiji  
Kutahuluka  
Mpata  
Diyoyo  
Mutshiaudi  
Dikuatshika dia  
maluvu

Manaya a bundu  
Ditekemena  
Disanka  
Malu mabi  
Meji mabi  
Masand

Dihaka dia manga  
Lukuna  
Kutandangana  
Mukau  
Ditendelela dia  
mpingu  
— Gal. 5:1921.



NSHIKIDILU WA MUNTU MUBI

ne difutu dilelela dia bubi. Ntatu ya mu Ngena idi imukuata. Nansha yeye musue kutendelela mpindiu kena mua kunvuangana ne Nzambi, bualu bua wakataba kumulengulula.

Balunda bandi ba kale bakadi batshina kusomba hehi ne bulalu buandi, ne mei abo a tshianana akadibo bamukolesha n'au kâtshiena ne dikuatshisha kudiye. Mabanshi andi akadiye muiba misangu mikuabo, kaena mua kulehesha matuku a muoyo wandi anyi kûsungila anyi kutalasha dikenga diandi ha kufua. Udi usangana ne mbikole bua kuela meji kabidi bualu bua Nzambi, bua diabolo udi umuhumbisha.

Bionso biakasueye ku mpala, bionso biakadiye mu-shikamine ne muoyo, bikadi bu bidi bimuseka mpindu. Balombodi bandi anyi bilobo biandi biakadi bimukolesha mu bubi kabena mua kumukuatshisha mpindiu. Katataka udi ubanga kujingulula ne, "Mbualu bua buowa bua kuhona mu bianza bia Nzambi udi ne muoyo." (Ebelu 10:31).


Wakadi mutekemene kudilongolola ne Nzambi dituku dikuabo nansha ha bulalu bua lufu, kadi mpindiu udi usangana ne nkumane kushika. Binunu ne binunu bia bantu badi bafue ne lufu lua tshikoso kabatshiyi mua kukeba Nzambi kabidi ha bulalu bua lufu. Nunku bidi bimpe kukeba Nzambi diba ditutshidi mua kumusan-gana. Ha tshindidimbi tshietu muntu eu mubi ukadi udifuila, mumane kuhidia ngasa ne dinanga bia Nzambi hakatshidiye ne muoyo. Katshiena unvua mei a dikankamika ne a muoyo a Nzambi. Dî dia Mulumbu-ludi (juge) didi dimuambila ne, "Umukai kundi, nudi ne mulau, nuye mu kahia ka tshiendelele kadi kate-meshela diabolo ne banjelo bandi" (Mat. 25:41). Bantu bonso badi ne bua kufua musangu umue, hashishe tshilumbuluidi tshilualua. (Ebelu 9:27).

### TSINDIDIMBI TSHIA TSHITEMA

Tshindidimbi etshi tshidi tshilesha muena kuitabu-sha uluangana bikole mu kahia ka ntatu ne mateta. Mutetshibue nseke yonso, udi ushala mujalame tshishiki, utamba bionso tô ne tshiendelele, muikale

Udi mua ku-  
tuhandulula  
ku dinanga  
dia Kilisto  
nganyi?  
Lomo 8:35.

Ndi ntumbila bianyi  
anu bualu bua mu-  
tshi mutshiamakane  
wa Mukelenge Yesu  
Kilisto. Gal. 6:14.



**MUTSHIMA WA MUHITSHI WA MALU  
MABI BUKOLE**

utamba mu Yesu Kilisto. Mesu andi adi matangile kudi Yesu, Nfumu ne mujadiki wa ditabusha. (Ebelu 12:1-2) Udi umusha bujitu buonso ne bubi bidi bimu-suika, unyema ne ditekemena mu mudimu udibo bamu-heshe.

Satana ne masalayi andi badi banyunguluke mu-tshima wa muena kuitabusha. Badi bidikisha mua kuhambula muana wa Nzambi mu nshila mululame, kadi badi bahanga. Budisu, dinanga dia biuma, nyuma wa bukoya ne mahanga makuabo a bungi bidi bimuenekamu.

Mpunda wakuhingana mu muaba wa nkashama, bualu bua misangu yonso bubi budi bukudimuka mishindu mishilangane, budisokoka mu tshivualu tshikuabo anyi dina ditahuluke.

Kadi muena kuitabusha mudimuke udi ujingulula bubi nansha buobu bulua budisokoke my buena Nzambi anyi bumueneka bu muanjelo wa munya, bualu bua Di dia Nzambi ne Nyuma wa Tshijila bidi bimulombola mu bulelela. Nudi numonamu muntu uja maja mukuate dikoho dia maluvu ku tshianza bua kueleye muena kuitabusha diteta, hamulesheye masanka a ha buloba. Malu â kaena mamanye mua kuenzela muena kuitabusha mujidila bualu nansha bumue. Bualu bua wakamana kufua ne Kilisto ku bubi bua ha buloba. Muntu mukuabo udi utaha mutshima wa muena kuitabusha wa lulamatu. Ke mushindu udi bijianu (dihidia dia buena Nzambi), tshierendenda, tuseku, dikanyina (milau) bia bena lukuna ba Nzambi. Misangu ya bungi bena kuitabusha ba dishima badi bataha mutshima wa muena kuitabusha mulelela. Kadi Nzambi atumbishibue!

Muena kuitabussha eu katu unvia bidi bantu bamba, kadi udi uditatshisha anu bua kuenza tshidi Nzambi wamba. Udi uvuluka mei a Yesu akambeve ne, "Hanuhendabo, ne hanukengeshabo ne hanushiminyinabo mashimi onso, bua bualu buanyi, nenuikale ne disanka. Nusanke, nuikale ne disanka dingi, bualu bua difutu dienu didi mu diulu ndinene" . . . (Mat. 5:11-12).

Nkuka ya mubidi, nkuka ya mesu ne kudisua kua muoyo bidi bienza ne muabi muonso bua kuhandulula muena kuitabusha ku dinanga dia Nzambi. Kadi tudi mua kuamba bu muakamba mupostolo Paulo ne, “Udi mua kutuhandulula ku dinanga dia Kilisto nganyi? Ntatu idi mua kuenza nunku, anyi kanyinganyinga, anyi tshinyangu, anyi tshiole, anyi butaka, anyi njiu, anyi muele wa nvita? Kadi mu malu â onso tudi tuta-mba kuhita bualu bua bukole bua Yesu wakatumanga.” (Lomo 8:35-37) Muluata biamu bia nvita bionso bia Nzambi, muena kuitabusha udi ushala muimane kulu mu matuku mabi ne utamba mateta onso mu Kilisto. Tuetu bietu tudi mua kutshimuna bua kuheta tshifulu tshia butumbi.

Mutoto wa tshilumbuluidi tshiandi tshia munda udi mutoke ne ukenka. Mutshima wa muena kuitabusha eu udi mûle tente ne ditabusha ne Nyuma wa Tshijila udi usombamu. Muanjelo wa Nzambi muimane ha mpala handi udi umuvuluisa milayi mimpe ya di dia Nzambi, yakalayabo badi batshimuna (batamba) ne badi bakanamana tô ne ku nshikidilu.

“Kudi udi uhita bukole, kudi yeye mene, nemmuhe bua kudieye mutshi wa muoyo udi mu Paladiso wa Nzambi.”

“Udi uhita bukole kena ukengeshibua ku lufu lui-bidi.”

“Kudi udi uhita bukole nemmuhe tshituha tshia mana masokoka ne nemmuheshe dibue ditoke, ne ha dibue dina dihia-dihia difundahu.”

“Udi uhita bukole ne udi ulama midimu yanyi tô ne kunshikidilu nemmuhe bukokeshi . . .”

“Udi uhita bukole nealuatshishibue nunku ne bilulu bitoke, ne meme tshiena njimisha dina diandi mu mukanda wa muoyo nansha kakese, ne nenjukule dina diandi ku mpala kua Tatu wanyi, ne ku mpala kua banjelo bandi.”

“Udi uhita bukole nemmuvuishe dikunshi mu ntem-pelo ya Nzambi wanyi, ne kena uluhukamu kabadi . . .”



“Udi uhita bukole nemmuhe bua kushikameye n’anyi mu nkuasa wa butumbi.” (Buak. 2:7, 11, 17, 26; 3:5, 12, 21).

Tshibutshilu tshia nfualanga tshibuluke tshidi tshilesha ne muena kuitabusha eu udi ufila kabidi nfualanga yandi kudi Nzambi. Ha mutu ha kuyinyangaye ku bintu bia ha buloba, udi ukuatshisha n’ai bahele, ufila tshia dikumi, ufila milayi, bionso bitumbisha anu Nzambi.

Bidia ne munyinyi wa mu mai bidi bijingulula muoyo wa mankenda wa muntu eu udi kauyi muhite budiavi. Katu wanua maluvu onso, katu wadia mashi a nyama, nansha tshintu tshidiye kayi mumanye anyi dinua dia bintu bibi, kadi udi udia tshia kudia tshia mankenda. Katu utula nfualanga yandi tshianana, kena unyanga mubidi wandi (ntempelo wa Nzambi), katu ûja mubidi wandi tente ne muishi mufike ne dinunka dibi dia makanya. Udi uya mu nsubu wa Nzambi matuku onso, nansha nvula uloka, anyi munya mukole utema, nansha malu kai mamukuate. Udi musue kutendelela, nansha ku nsubu kuandi, nansha mu diku diandi, anyi mu musokoko, bualu bua udi mumanye biandi ne muena kuitabusha kena mua kusomba kayi unvuangana ne Nzambi mu mitendelelu.

Mukanda eu mubulula mMukanda wa Nzambi udiye ubala ne ulonga matuku onso. Udi usanganamu meji ne bukole, muoyo, munya ne mabanshi kâyi mua kuamba. Mukanda wa Nzambi wakulua muinda ku makasa andi ne muela wandi wa nvita bua kuluisha n’au muena lukuna. Mukanda eu udi ne dikuatshisha dinene kudiye, bualu, bua mbidia nyuma bia buatshia-buathshia bia muoyo wandi, udi mai a muoyo adi ashikisha nyota yandi, ndijiba diakoweye mai, ndumuenu bua kudimoneye.

Muntu eu udi musue kuambula mutshi mutshiamakane bualu bua udi mumanye ne kakuena tshifulu tshia butumbi hadiku kakuyi mutshi mutshiamakane.

Bualu bua udi mumanye ne wakumana kubika ku lufu diatshimue ne Kilisto, muoyo wandi muhia-muhia

udi ukeba bintu bia mu diulu, bintu bia kashidi bidi kabiyi bimueneka ku mesu. Udi mukumbanyine kumangana ne Nzambi ne udi bu mutshi mukuna ku kala kua mai, udi ukuama mamuma bu mudi ditamba dia mutshi wa tumuma tukunze dikuama mamuma a bungu. Muntu eu kena ne ditshina dia lufu bualu bua Nyuma wa Tshijila ne Dinanga dimpe dia Nzambi bidi biûsha mutshima wandi tente. Mis. 1:1-3; Yone 15:1-14; 1 Yone 4:18-21.

### TSINDIDIMBI TSHIA DIKUMI

**Lua, ubuele mu disanka dia Tatu wanyi—Matayo 25:34.**

Yesu wakamba ne, “Ndi bianyi dibisha, ndi bianyi muoyo, udi ungitabusha nansha biafueye neikale ne muoyo kabidi; udi ungitabusha, kena ufua tshiendelele.” (Yon. 11:25-26) “Unvua di diany, wita busha wakuntuma, udi ne muoyo wa tshiendelele, kena ulua ku tshilumbu, wakumuka mu lufu, wakubuela ku muoyo.” (Yone 5:24) Lufu kaluena lukuatshisha muena kuitabusha buowa anyi ditshina. “Hamana mubidi eu mubole kuluata udi kawi mubole ne hamana mubidi eu udi ufua kuluata udi kawi ufua tshiendelele, hashishe, di diakafundabo nedishike ne, Lufu luakaminyibua mu kulutamba kua Kilisto. Lufu, kutamba kueba kudi hanyi? Lufu, kalonda kebe kadi hanyi? Kalonda ka lufu kadi bubi ne bukole bua bubi budi mikenji; kadi tuasakidila kudi Nzambi, udi utuha kutamba kua lufu bualu bua Mukelenge wetu Yesu Kilisto.” (1 Kol. 15:54-57).

Muntu ukadi muendakane ne Nzambi ne ukadi musombe n’andi kena ne buowa bua lufu. Hakumbana diba diandi, udi uya biandi ne disanka bu mudi mupostolo Paulo wamba ne, “Ndi njinga bua kumuka hantu bua kuikala ne Kilisto; bua bualu ebu budi butamba buimpe.” (Fil. 1:23).

Muena kuitabusha udi ne dijinga dia kumona Yesu mpala ha mpala. Udi musue kumona Yeye wakamufuila ha mutshi mutshiamakane bua kumusungila. Nyuma wa Tshijila udi umuvuluisha kabidi mei a Yesu ne,



**DIFIKA DIETU MU DIULU NE DISANKA**

“Mitshima yenu kaizakadi, nuitabushe Nzambi nungitabushe Nzambi nungitabushe meme kabidi. Mu nsubu wa Tatu wanyi mudi miaba ya bungi ya kuikala; newa Tatu wanyi mudi miaba ya bungi ya kuikala; nempingane kabidi nenuangate kundi meme muine, bua kundi ngikala nuenu nenuikaleku kabidi.” (Yone 14-1-4).

“ . . . Malu adi disu kadfi dianze kutangila, ne ditshu kadfi dianze kunvua kâyi manze kubuela mu mutshima wa muntu, malu onso akalongoluela Nzambi badi bamunanga.” (1 Kolinto 2:9).

Kakuena dî dijalamene mene mene hanshi ha buloba ebu didi mua kujingulula butumbi bua mu Diulu buakalongoluelabo bonso badi balonda Mukelenge Yesu Kilisto.

Ha muaba wakadi mifuba ya muntu mikuate buowa (lufu) tudi tumona mu tshindidimbi etshi tshia nshikidilu muanjelo, mpulushi wa Nzambi. Udi muindile bua kuya kufileye muntu mubi mubingishibue kudi Nzambi. Muoyo ne nyuma bidi biumushibue ku mubidi udi ufua ne bidi biya kudi Yeye wakasuabo kudi muoyo, bua bualu buandi wakadi ne muoyo ne bua bualu buandi wakafua. Nzambi udi umuakidila ne mei mimpe a buenyi a Mukelenge ne Muyishi: “Bimpe muana wanyi muimpe ne mutumikidi, wewe wakadi utumikila hawakadi ha mutu ha bintu bikese, nenkuteke ha mutu ha bintu bia bungi, buela mu disanka dia Mukelenge webe.” (Mat. 25:21) Satana kena ne bukole kudye bualu bua “Lufu lua bansanto bandi ludi bu tshintu tshia mushinga mukole ku mpala kua Yehowa.” (Mis. 116:15) “Nakunvua dî difuma mu diulu diamba ne, Funda ne, Bafue badi bafue mu Mukelenge badi ne disanka katataka tô ne tshiendelele. Nyuma udi wamba ne E, bua bobo bikishe ku midimu yabo, bienzedi biabo bidi biya n’abo.” (Buak. 14:13).

Muan’etu munanga ,haudi ubala mukanda eu, Nzambi akukuatshishe bua kufila muoyo webe kudi Yeye udi ukunanga, bualu bua musangu eu, udi usemena hehi n’ebe (udi wakula n’ebe) wamba ne “Muan’anyi, mpeshe mutshima webe.” Nsu. 23:26) Fila muoyo webe

muhungile, mutatshishibue ne mukengeshibue kudi Yesu; Yeye neakuhe muoyo muhia-muhia ne nyuma muhia-muhia. Kuitabushi bua mutshima webe ukudinge mu dilonda dia nkuka yau, bualu bua "Udi weyemena anu mutshima nkayau udi muhote; kadi udi wendakana ne meji neahandishibue." (Nsu. 28:26) Lekela mibi yebe, ne udifile ku bushuwa "bualu bua difutu dia bubu ndufu, kadi kuha kua Nzambi mmuoyo wa tshiendelele mu Kilisto Yesu Mukelenge wetu." (Lomo 6:23).

Ne hawahingashila Nzambi muoyo webe, ulame bikole tshiwakumana kuheta mu ditabusha ne dinanga bidi mu Yesu Kilisto bu mudi mupostolo Paulo wamba mu mukanda muibidi wa Timote 1:12 ". . . bua ndi mumumanye yeye unakuitabusha, ne nakuitabushishibua ne yeye udi ne bukole bua kulama tshintu tshianyi tshiteka tô ne dituku diadia."

Udijadike mu ditabusha dia tshijila, ulombe mu Nyuma Muimpe, udilame mu dinanga dia Nzambi, utangile kudi Yesu, Mubangidi ne Mushikishi wa ditabusha dietu, Mukelenge wa bakalenge ukadi ha kulua bua kutuangata.

"Katataka kudi yeye udi mumanye mua kunulama bua nuenu kanulenduki, ne udi mua kunuteka ku mpala kua butumbi buandi ne disanka ditamba bunene, kanuyi ne tshilema; kudi Nzambi umuehele, Musungidi wetu, bua Yesu Kilisto Mukelenge wetu, kuikala butumbi ne buneme, ne bukokeshi ne bukole ku mpala kua bikondo bionso ne katataka ne tshiendelele. Amen." (Yuda 24-25).

### I.

Musoko udi muimpe kulu, Bantu bonso bimpe badiku, Musoko wa disanka dimpe, Ne malu makane a Nzambi.

### Kolus-

Musoko wa Nzambi wa disanka ne malu mimpe;  
Musoko wa Nzambi wa disanka ne malu mimpe.

### III.

Hatuafika kulu kua Nzambi, Netutumbishe Musungidi, Netumuimbile bilengele, Netuikale n'andi kashidi.

**A SPECIAL WORD FROM ANGP**  
**UN MONDE SPÉCIAL DE L'ANGP**  
**UMA PALAVRA ESPECIAL DA ANGP**

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from [www.angp-hb.co.za](http://www.angp-hb.co.za) or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de [www.angp-hb.co.za](http://www.angp-hb.co.za) ou comme une Application "Heart of Man" sur téléphones Android.

Este livro "O Coração do Homem" é obtido em mais de 538 línguas e dialectos falados em todo o mundo, a saber: (África, Ásia, América do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de [www.angp-hb.co.za](http://www.angp-hb.co.za) ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

**l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.**

**As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.**



**Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.**

**If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.**

**Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.**

**Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.**

**Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.**

**Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos**

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratufamente a literatura evangelica, livros e folhetos em mais de 538 lnguas diferentes escreva para:

E-MAIL: [info@angp-hb.co.za](mailto:info@angp-hb.co.za)  
[info@angp.co.za](mailto:info@angp.co.za)

**ALL NATIONS GOSPEL PUBLISHERS**

**P.O. Box 2191**

**PRETORIA**

**0001**

**R.S.A.**

**A Gospel Literature Mission financed by donations**  
**Une Mission de litterature evangelique financee de dons**  
**Missao de literatura Evangelica financiada por donativos**

(Reg. No. 1961/001798/08)